

02 JUN 1996

Mahathir-Israel

PERTUKARAN PUCUK PIMPINAN ISRAEL AKAN BANTUT PROSES PERDAMAIAN

LANGKAWI, 2 Jun (Bernama) -- Malaysia berpendapat pertukaran pucuk pimpinan Israel akan membantutkan proses damai di Asia Barat.

Perdana Menteri Datuk Seri Dr Mahathir Mohamad hari ini berkata, kemenangan Benjamin Netanyahu pada pilihan raya baru-baru ini merupakan satu tamparan hebat kepada usaha perdamaian.

"Saya berpendapat kemenangan Netanyahu adalah satu kejayaan kepada kumpulan Hamas dalam usaha mereka menghalang proses perdamaian," katanya pada persidangan berita di sini.

Dr Mahathir menyifatkan keadaan yang berlaku di negara itu sebagai ganjil kerana kedua-dua kumpulan pelampau Israel dan Islam kelihatan bekerjasama untuk menggagalkan usaha berkenaan.

Beliau berkata semua pihak tahu bahawa pelampau Yahudi sememangnya tidak bertolak-ansur sama seperti pelampau Islam dan apabila mereka bekerjasama, ia mewujudkan satu keadaan yang ganjil.

"Saya berpendapat keadaan ini akan mengganggu proses perdamaian di negara berkenaan," katanya.

Dr Mahathir berkata Malaysia belum membuat sebarang pendirian berhubung dengan perkembangan terbaru itu sebaliknya akan memerhatikan apa yang akan berlaku.

Netanyahu yang memimpin parti Likud yang berhaluan kanan menang tipis pada pilihan raya Israel Rabu lepas menewaskan Perdana Menteri Shimon Peres.

Menurut laporan akhbar, Netanyahu yang berkempen menentang pertukaran wilayah Arab untuk perdamaian akan melambatkan atau membekukan usaha ke arah penyelesaian rundingan Palestin-Israel. -- BERNAMA

ZAA PR